

समा. 09.20 Hrs

## Headlines

1. मुखमन्त्री उमर अब्दुल्ला होरें जम्मू ते श्रीनगर मैडिकल कालजें च MBBS दियां सीटां बदाए जाने दा सुआगत कीता ते आखेआ कि जम्मू-कश्मीर च मैडिकल शिक्षा बवस्था गी निग्गर बनाने बक्खी एह इक महत्वपूर्ण गेंह ऐ।
2. जम्मू-कश्मीर सरकार नै “कोइ” दी बमारी गी अधिसूचित रोग घोषत कीता। एल.जी हुंदे हुकमै मताबक कुदरै बी एहदा पता लग्गने पर तुरत सूचित करने दा निर्देश।
3. कल तकरीबन 24 ज्हार शरदालुएं अमरनार्थें दी गुफा च मत्था टेकेआ। अज्ज यात्रा दा आंकड़ा 3 लक्ख कोला पार पुज्जने दी मेद। जम्मू थमां 5 ज्हार 335 शरदालुएं दा इक होर जत्था घाटी लेई रवाना।
4. उत्तराखंड दे इक साबका मुखमन्त्री कल एल.जी होरें’गी मिले, केंई शिश्टमंडलें बी उनें’गी मिलियें अपने मुद्दें उन्दे अग्गे रखे।
5. “गीन जम्मू क्लीन जम्मू” पैहल तैहत जम्मू निगर-निगम दा वृक्षारोपन अभियान शुरु, इस बरसांती 50 ज्हार बूहटे लाने दा लक्ष।

## CM- MBBS Seats

मुख्यमंत्री उमर अब्दुल्ला होंरें सेहत ते मैडिकल शिक्षा मंत्री स्कीना इतू ते सरकारी मैडिकल कालेज जम्मू ते श्रीनगर दे प्रशासन गी इ'नें दंऊ मैडिकल कालजे च डाक्टरी दी पढ़ाई गितें सीटें च बाददें गी मंजूरी थोने पर ममारकबाद दिती ऐ। जियां जे पैहले बी खबर दिती जाई चुकी दी ऐ कि राश्ट्रीय मैडिकल आयोग NMC ने जंदे रोज इ'नें दंऊ मैडिकल कालजें च MBBS दियां 50-50 सीटां बधाने दी मंजूरी देई दिती ऐ ते एह 2026-27 आहले शैक्षणिक सत्र थमां लागू होग। मुख्यमंत्री होंरें आखेआ कि एह फैसला जम्मू-कश्मीर च मैडिकल शिक्षा ते सेहत ढांचे गी निगगर बनाने दी दिशा च इक महत्वपूर्ण गेंह ऐ ते एहदे नै डाक्टरी दी पढ़ाई करने दी इच्छेया रखने आहले विद्यार्थियें गी बी मौका थोग।



## J&K Leprosy

जम्मू-कश्मीर सरकार नै उपराज्यपाल मनोज सिन्हा हुंदे हुकम जारी करने मगरा कोढ़ दे रोग गी आधिकारिक तौरा पर इक अधिसूचित बमारी करार दिता ऐ। हून सब्भनें सरकारी ते निजी सेहत केन्द्रें गी लोड़चदा ऐ जे ओह कोढ़ रोग दे हर तस्दीकशुदा मामले दी जानकारी उचित सेहत अधिकारिएं गी देन। इस गेंह दा मकसद रोग दा पता लाने गी बढ़ावा देना, इस गल्लै गी यकीनी बनाना ऐ जे मामलें दा तौले पता लाया जा ते समें-सिर इलाज कीता जाई सके ते इस बमारी गी फैलने थमां रोकेआ जाई सकै। इस फैसले कन्नै निगरानी च सुधार, मामलें दा असरदार तरीके कन्नै प्रबंधन ते सार्वजनिक सेहत जतनें च तालमेल बनाइयै भारत दे कोढ़ मुक्त होने दे बड़े लक्षs दा बी प्रण कीता गेआ ऐ।



### Amarnath Yatra 13<sup>th</sup> Batch (Byte)

जंदे रोज श्री अमरनाथ जी यात्रा च मुल्खै दे बक्ख-बक्ख हिस्सें थमां तकरीबन 24 जहार श्रद्धालुएं श्री अमरनाथ जी हुंदी पवित्र गुफा च मत्था टेकेया। अधिकारियें दस्सेआ जे 3 जुलाई गी शुरु होई दी 57 दिनें दी सलाना श्री अमरनाथ जी यात्रा दे अज्ज 12में ध्याड़े मेद ऐ जे पवित्र गुफा च मत्था टेकने आले यात्रुएं दी गिनतरी 3 लक्ख दा आंकड़ा पार करी जाग। यात्रा पूरी होने मगरा अपनी खुशी जाहिर करदे होई किश श्रद्धालुएं आखेआ.....(बाईट)

तोंआई श्री अमरनाथ जी श्रद्धालुएं दा 13मां जत्था अज्ज बड्डलै सख्त सुरक्षा बंदोबस्तें हेठ जम्मू दे भगवती नगर “यात्री निवास” आधार शिविर थमां कश्मीर घाटी लेई रवाना होआ। साढ़े संवाददाता दी रिपोर्ट मुजब, 232 गड्डियें दे काफिले च रवाना होए दे इस जत्थे च कुल 5 जहार 335 श्रद्धालू न, जिंदे चा इक जहार 736 श्रद्धालू बालटाल लेई ते 3 जहार 599 श्रद्धालू पैहलगाम लेई रवाना होए दे न। इस जत्थे च कुल 3 जहार 911 मर्द, 1 जहार 288 महिलां, 21 बच्चे, 90 साधु, 24 साध्वियां ते इक ट्रांसजेंडर यात्रु शामिल हे।



### Amarnath OGW

श्री अमरनाथ जी यात्रा लेई तकनीक आधारित सुरक्षा बवस्था दे चलदे अनंतनाग पुलिस ने चेहरे राएं पंछान आहली प्रणाली (FRS) दे अलर्ट दी बदौलत X-Ray Point नुनवन, पहलगाम पर इक

Over Ground Worker गी फगड़ेआ ऐ। इस व्यक्ति दी पंछान पुलवामा दे रौहने आहले फैसल मुज़फ़्फर दे तौर पर कीती गई ऐ। FRS अलर्ट पर फौरन कारवाई करदे होई पुलिस नै मुज़फ़्फर गी रोकी दिता ते जांच ते अगगे दी कनूनी कारवाई आस्तै उसी हिरासत च लेई लैता।

<><><><><><>

## GoC Visit

फौजी दी व्हाई नाइट कोर दे GoC होरें मजूदा हालात दे चलदे जमीनी हालात ते कारवाइयें सरबंधि तयारियें दा जायजा लैने लेई Ace of Spades डिवीजन ते सी.आई.एफ रोमियो दे बक्ख-बक्ख ठकाने दा दौरा कीता। कोर कमांडर होरें इस दौरान सैनिकें दी निश्ठा, दलेरी, सतर्कता ते सुरक्षा ते स्थिरता बनाई रखने च उन्दी महत्वपूर्ण भूमिका दी सराहना कीती। बक्ख-बक्ख ठकाने पर तैनात सैनिकें कन्नै गल्लबात दौरान उन्दे पेशेवराना रौंऽ ते बुलंद होंसले दी सिफ़्त कीती। इस दौरान उनें'गी फौज दी छमता च बाददा करने लेई कीते जा'रदे हीलें ते कारवाइयें बारे जाककारी दिती गई। एहदे इलावा कारवाइयें सरबंधी तयारियें, निगरानी सरिस्ते, कुसै बी चनौती कन्नै निबड़ने लेई बवस्था- तयारी ते होरनें प्रबंधें दे बारे च बी तफसीली जानकारी बी उनें'गी दिती गई।

<><><><><><>

## LG Delegations

उत्तराखंड दे साबका मुखमंत्री तीरथ सिंह रावत होर कल लोकभवन श्रीनगर च उपराज्यपाल मनोज सिन्हा होरें'गी मिले ते केई महत्वपूर्ण विशें पर गल्लबात कीती। उन्दे इलावा केई

शिश्टमंडल बी कल एल.जी होरें'गी मिले ते लोक हित दे बक्ख-बक्ख चाल्ली दे मुद्दे उन्दे अगगे रक्खे। पहाड़ी ट्राइबल एम्पलाइज़ वेलफेयर फोरम दा इक प्रतिनिधिमंडल अपने अध्यक्ष खालिद मोहम्मद खान हुंदी अगुआई च एल.जी होरें'गी मिलेआ ते पहाड़ी जनजाती लोकें दे हितें बारे गल्लबात कीती। शिश्टमंडलै एस.टी.टू मलाजमें गी उन्दी प्रमोशन च इस श्रेणी दा लाह देने दी मंग रखी। तोंआई शोपिया थमां विधायक एडवोकेट शबीर अहमद कुल्ले हुंदी अगुआई च इक शिश्टमंडल मनोज सिन्हा होरें'गी मिलेआ ते जंगलात अधिकार कनून सनें होर केई जनहित आहले मामलें पर उन्दे नै चर्चा कीती।

<><><><><><>

### Satish Delegations

ट्रांसपोर्ट मंत्री सतीश शर्मा होरें जंदे रोज जम्मू संभाग दे बक्ख-बक्ख जिलें दे केई प्रतिनिधिमंडलें कन्नै मलाटी करियै केई सार्वजनिक मुद्दे पर चर्चा कीती। मलाटी करने आहले लोकें सिड़क सम्पर्क, पीने आहले पानी, बिजली आपूर्ति, खेड्ड सुविधाएं, राशन दी बंड, डिजिटल सेवाएं ते रोजगार दे मौके आहले मुद्दे पुटटे। मंत्री होरें उनें'गी भरोसा दोआया जे उंदियां सब्बै जायज़ मंगें गी सरबंधत मैहकमे गी भेजी दिता जाग। उनें पारदर्शी, लोक केन्द्रित शासन ते लोकें दिएं दिक्कतें-परेशानियें गी तुरत नबेड़ने लेई सरकार दी वचनबद्धता गी फही पक्का कीता।

<><><><><><>

### JMC Green Jammu (Byte)

जम्मू नगर-निगम नै शैहरी जंगलात डिवीजन दे सहयोग कन्नै अपने “ग्रीन जम्मू- क्लीन जम्मू” पैहत तैहत बूहटे-पौधे लाने दा इक बडडा अभियान रम्भेआ ऐ, जेहदे तैहत कल सुंजवां-चोहादी सिड़कें कंडे 2 जहार कोला मते बूहटे लाए गे। राश्ट्रीय स्वच्छ वायु कार्यक्रम तैहत चलाए गेदे इस अभियान दा मकसद ब्हाऊ दे म्यार च सुधार आहन्नना, शैहरी इलाके च जींदा बन-सबन्नता गी बढ़ावा देना ते शैहरें-नगगरें च हरियाली आहले इलाकें च बाद्दा विस्तार करना ऐ। जम्मू नगर-निगम दे कमीशनर डाक्टर देवांश यादव होरें इस बारे जानकारी दिंदे होई दस्सेआ जे इस बरसांती दी रुतै दौरान पूरे जम्मू च कोई 50 जहार बूहटे लाने दा लक्ष रखेआ गेदा ऐ। उ’नें जम्मू दे आम लोकें अगगें बी अपील कीती जे ओह बूहटे लाने दी मुहीम च बड़ी-चढ़ियै हिस्सा लैन ते लाए गेदे बूहटें दी दिक्खभाल च अपना योगदान बी देन। उ’नें आखेआ.....(बाईट)

<><><><><><>

## Weather

मौसम विभाग नै अज्जै कोला लेइयै 17 जुलाई तगर जम्मू-कश्मीर दे बक्ख-बक्ख हिस्से च गर्मी ते गुम्मे दे कन्नो-कन्नी बिच्च-बिच्च किश समें लेई हलकी बरखा दी पेशनगोई कीती ऐ। जारी जानकारी मुजब 18 कोला 20 जुलाई दे दौरान केन्द्र शासत प्रदेश दे मते सारे हिस्सैं च गर्ज चमक कन्नै बरखा बरने दा इक होर गेड़ लग्गने दे बी असार दस्से गेदे न। लोकें गी सलाह दिती गेई ऐ कि ओ भारी बरखा ते गड़कने चमकने दौरान मते सौहगे-सतर्क रौहन।

<><><><><><>